

# Meishaleny aktif dalam dunia kesukarelawan

## LIMA soalan

**B**ERPANDANGAN jauh. Itulah perkataan yang sesuai diberikan kepada pemilik nama Meishaleny David atau lebih mesra disapa Meisha. Sifatnya yang sentiasa memandang ke hadapan membuatkan gadis berusia 23 tahun itu berjaya merangkul anugerah Pingat Emas Alumni pada Majlis Konvokesyen Universiti Putra Malaysia ke-42 di Serdang, Selangor baru-baru ini.

Sejak di bangku sekolah lagi Meisha sudah menunjukkan sifat kepimpinan dan berdaya

saing. Anak bongsu daripada tiga beradik itu sering memasuki pelbagai pertandingan dan kuiz anjuran sekolahnya.

Dia sering mengambil bahagian dalam organisasi yang mempunyai nilai kepimpinan yang tinggi seperti menjadi Bendahari (2011) dan Presiden (2012) Kelab Interact, Presiden Kelab Tenis, President Pusat Sumber dan Naib Presiden Sidang Redaksi Majalah Sekolah.

Ikuti temu bual bersama gadis berjiwa besar ini agar kejayaannya dapat menjadi inspirasi dalam kehidupan kita.



MIESHALENY sentiasa menjadikan keluarga sebagai sumber rujukannya.

### 1 Boleh ceritakan mengenai latar belakang saudari?

Saya mempunyai dua orang abang iaitu Maniraj dan Silvaraj. Kami bersyukur kerana mempunyai ibu bapa yang amat menyayangi kami iaitu David dan Seetha.

Saya berasal dari Shah Alam, Selangor dan bersekolah di Sekolah Menengah Kebangsaan Seksyen 19, Shah Alam (SMKS 19).

Meskipun saya bersekolah di sekolah harian, ia tidak menjadi masalah buat saya untuk menjadi seorang pelajar yang aktif dalam pelbagai bidang.

Saya mengambil peluang tersebut mengilap potensi diri.

Selain itu, guru-guru dan rakan-rakan juga banyak membantu serta memberikan dorongan untuk saya membuat sesuatu perkara itu dengan sebaik mungkin.

Antara aktiviti yang kerap saya serta sewaktu bersekolah ialah menyertai aktiviti-aktiviti kokurikulum. Antaranya, Kuiz Kimia Antarabangsa, Pertandingan Debat Bahasa Melayu Ala Parlimen, Pertandingan Choral Speaking dan Projek Warga anjuran Inisiatif Kewarganegaraan Malaysia.

MIESHALENY bersama bapanya, David yang menjadi pendorong kejayaannya pada hari ini.



### 2 Apakah sumbangan saudari sehingga berjaya meraih anugerah Pingat Emas Alumni?

Pingat Emas Alumni dilihat dengan dua kriteria yang penting iaitu pencapaian akademik dan kewibawaan dalam bidang kesukarelawan. Sehingga kini, saya sentiasa aktif dalam organisasi yang mempunyai nilai kemanusiaan yang tinggi. Antara pencapaian tertinggi saya dalam bidang kesukarelawan ialah menjadi Naib Presiden, The Kalsom Movement (2017/2018).

The Kalsom Movement merupakan badan kesukarelawan yang dimulakan oleh pelajar-pelajar Malaysia yang menuntut di universiti ternama di United Kingdom pada tahun 1994 untuk membanteras jurang pendidikan antara kawasan bandar dan luar

bandar di Malaysia. Saya mengambil bahagian sebagai ahli jawatankuasa bagi dua sesi dan juga sebagai fasilitator bagi satu sesi. Keseluruhannya saya tiga tahun bersama The Kalsom Movement.

Selain itu, saya menjadi fasilitator bagi kem Seeds of Deeds anjuran Small Changes. Motif kem Seeds of Deeds juga serupa dengan program anjuran The Kalsom Movement.

Kedua-dua organisasi ini telah membentuk saya dalam memantapkan daya saing dan memberi peluang untuk menyumbangkan tenaga kepada anak muda yang kurang bernasib baik.

### 3 Siapakah pendorong utama saudari sehingga berjaya seperti hari ini?

Idola terdekat adalah abang-abang dan kakak-kakak senior di sekolah dan universiti mereka, perkara-perkara kecil yang sering kali diamalkan oleh rakan sekerja di Kalsom Movement amat mendorong saya untuk buat lebih baik daripada yang sedia ada.

Idola yang saya hargai daripada dahulu sehingga kini ialah Mother Teresa. Kata-kata mutiara beliau akan saya pegang hingga bila-bila.



PINGAT Emas Alumni yang diberikan kepada Meishaleny merupakan tajaan daripada alumni UPM.

### 4 Apakah cita-cita dan pelan masa depan saudari?

Pada masa ini, saya beraspirasi untuk menjadi pegawai urus tadbir di industri farmaseutikal. Ini adalah kerana saya mengenali diri saya dengan baik dalam masa empat tahun di universiti, maka jurusan sebegini amatlah sesuai dengan kekuatan saya.

### 5 Apakah nasihat saudari kepada golongan belia di luar sana yang ingin berjaya seperti anda?

Penjelajahan adalah kunci kejayaan. Khususnya bagi golongan belia milenium yang ingin sentiasa mencuba sesuatu yang baharu dan asing, teruskan perjalanan anda ke arah mengenali diri dan Pencipta kita dengan lebih baik.

Cuba permudahkan urusan orang lain, maka urusan kita juga akan dipermudahkan. Sebaik-baiknya amalkan tabiat membaca buku di mana jua anda berada. Jangan lupa untuk terus berfikiran positif walau apa jua cabaran yang datang.



ANTARA rakan baik yang menyaksikan jatuh dan bangun Mieshaleny.



GADIS ini banyak terlibat dengan kerja-kerja sukarelawan sejak di bangku sekolah lagi.